

Headlines

1. उपराज्यपाल मनोज सिन्हा होरें आखेआ जे जिसलै तगर जम्मू-कश्मीर थमां नशीले पदार्थे दी माड़ी कबैत पूरी चाल्ली खत्म नेई होई जंदी, उसलै तगर प्रशासन लगातार जतन करदा रौहग। उनें आखेआ जे एहदे लेइ, लोकें दा समर्थन जरूरी।
2. मुखमंत्रि उमर अब्दुल्ला होरें अज्ज स्कूली शिक्षा मैहकमे दे अस्थाई कर्मचारियें गी पक्का करने दे हुक्म जारी कीते।
3. जम्मू-कश्मीर सरकार नै ईद-उल-अजहा दे त्यौहार लेई 29 मई गी स्पेशल कैजुअल लीव देने दी घोशणा कीती ऐ।
4. राश्ट्री जांच एजेंसी-एनआईए नै शोपियां जिले दी दो थाहें पर छापेमारी कीती ऐ।
5. मौसम विभाग नै जम्मू-कश्मीर च अज्ज बक्ख-बक्ख थाहें पर हल्की कनी-कनोन ते तेज ब्हाएं दी पेशगोई कीती ऐ।

<><><><><><>

LG Nasha Mukt Bandipora

उपराज्यपाल मनोज सिन्हा होरें आखेआ जे नशीले पदार्थे दी तस्करी ते एहदे राएं आतंकवाद गी बढ़ावा देना जम्मू-कश्मीर लेई इक बड़ी चुनौती ऐ। उनें आखेआ जे प्रशासन इस कबैतू गी केंद्र शासित प्रदेश थमां पूरी चाल्ली खत्म करने तगर रमानदारी कन्नै नेई बैठोग। एस.के स्टेडियम बांडीपोरा च किट्ट गी संबोधित करदे होई आखेआ जे नशीले पदार्थे राएं किट्टा कीता गेदा पैसा आतंकवादिएं तगर पुजजा'रदा ऐ ते एहू नशा जम्मू-कश्मीर च परौआरें गी तबाह करा'रदा ऐ। आतंकवाद करी केई बच्चे अनाथ होई गए न।

<><><><><><>

NashaMukt Mushaira

नशीले पदार्थें खिलाफ लड़ाई गी मजबूती देने ते नशे दे माड़े असर बारै युवाएं गी जागरूक करने दे मकसद कन्नै जिला प्रशासन उधमपुर आसेआ नशामुक्त भारत अभियान तैहत भारती कालेज आफ एजुकेशन च विशेष मुशायरे दा सरिस्ता कीता गेआ। उधमपुर दे डिप्टी कमिशनर मिंगा शेरपा होरें इस कार्यक्रम च बतौर मुख परौहने शिरकत कीती। एसएसपी उधमपुर होर इस मौके मानजोग परौहने दे तौर पर मौजूद हे। इस मौके प्रतिभागिएं अपनी रचनाएं राएं लोकें च नशे खिलाफ जागरूकता पैदा कीती।

<><><><><><>

Nasha-Mukt-Ramban

रामबन जिले च नशामुक्त भारत अभियान तैहत प्रदेश च 100 दिन दा सरबन्धी अभियान जोरें-शोरें कन्नै जारी ऐ। एहदे च मुकामी जिला प्रशासन सेहत ते समाज कल्याण मैहकमा बदी-चढिए हिस्सा लै'रदा ऐ। इस अभियान तैहत स्कूल, कालेज ते मुकामी समुदाय दी शूलियत कन्नै रैलियां, नुक्कड़ नाटक, मैराथान बगैरा दा सरिस्ता कीता जा'रदा ऐ तां जे इस भेठा जागरूकता पैदा कीती जाई सकै। इस दरान खास ध्यान युवाएं पर ते शिक्षा इदारें पर दित्ता जा'रदा ऐ तां जे शुरूआती उम्र च गै उनेंगी नशीले पदार्थें थमां बचाया जाई सकै। कनून नाफिज करोआने आहिलियां एजेंसियां नशीले पदार्थें दी तस्करी करने आहले ते सरबन्धी लोकें दी पंछान करा'रदियां न तां जे उंदे खिलाफ सख्त कार्रवाई कीती जाई सकै।

<><><><><><>

CM-CPWs

मुख्यमंत्री उमर अब्दुल्ला होरें अज्ज श्रीनगर दे सिविल सचिवालय च स्कूली शिक्षा मैहकमे च लोड़ पौने पर लाए जाने आहले कम्मगारें गी पक्का करने दे हुक्म जारी कीते। इस मौके पर स्कूली शिक्षा मंत्री सकीना इतू होर बी उत्थे मौजूद हियां। मुख्यमंत्री होरें निजी तौरा पर गांदरबल ते बांदीपोरा जिले च इनें कर्मचारियें गी पक्का करने आहले हुक्म सौपे ते उनेंगी भविक्ख लेई शुभकामनां दित्तियां। उनें मेद जाहिर कीती जे मलाजम स्कूली शिक्षा विभाग गी मजबूत बनाने ते सार्वजनिक सेवा उपलब्ध करोआने लेई रमानदारी, बचनबद्धता ते समर्पणभाव कन्नै कम्म

करना जारी रखडन। कर्मचारियें लम्में चिरें थमां बकाया पेदी उंदी मंग गी पूरा करने लेई
मुखमंत्री हुंदा आभार प्रगट कीता ऐ।

<><><><><><>

Spl. Casual Leave

जम्मू-कश्मीर सरकार नै केंद्र शासत प्रदेश दे ओकड़े कर्मचारियें लेई 29 मई 2026 शुक्रवार गी
इक दिनै दी स्पेशल कैजुअल लीव दी मंजूरी देई दित्ती ऐ जेड़े उस दिन ई-उल अजहा मनाना
चाहंदे न। आम प्रशासनिक विभाग आसेआ जारी इक हुकमै मूजब एह छुट्टी पूरे जम्मू-कश्मीर च
धार्मिक त्यौहार मनाने दे सिलसिले च दित्ती गई ऐ। सरकार दे कमीशनर सचिव एम. राजू हुंदे
आसेआ जारी हुकमै च आखेआ गेआ ऐ जे एह बशेष छुट्टी ओकड़े मलाजमें पर लागू होग, जेहड़े
ईद उल अजहा दे मौके पर छुट्टी लैना चाहंदे न।

<><><><><><>

NIA-Raids

राश्ट्री जांच एजेंसी नै शोपियां जिले दी 2 थाहरें पर छापेमारी कीती जेदे च दरूल उलूम
सिराजुल उलूम बी शामिल ऐ, इसी पिछले म्हीने गै गैर कनूनी करार दित्ता गेआ हा। एनआईए
नै शोपियां दे इमाम साहिब इलाके च बी छापेमारी कीती। एह शिक्षा इदारे धार्मिक ते
औपचारिक शिक्षा उपलब्ध करोआंदे न। अधिकारी नै दस्सेआ जे एनआईए दी टीम नै जमात ए
इस्लामी दे साबका प्रमुख शहजादा औरंगजेब दे घर पर बी छापेमारी कीती।

<><><><><><>

Eid-Arrangements Poonch

औंदे ईद दे त्यौहार गी मनाने आस्तै समारोहें दे इंतजामें दा जायजा लैने लेई डिप्टी कमिशनर
पुंछ होरें इक टीम दा गठन कीता ऐ जेहदी अगुवाई एडीसी पुंछ ताहिर हुसैन मुस्तफा होर
करडन। टीम नै अज्ज जिले दिएं बक्ख-बक्ख मंडियें दा व्यापक दौरा लाया तां जे इस उत्सव गी
सुचारू तरीके कन्नै मनाने लेई कीते जा'रदे इंतजामें दा जायजा लैता जाई सकै। निरीक्षण दरान
अफसरें साफ-सफाई ते उपाय, पीने आहले पानी दी उपलब्धता, ट्रैफिक पबंधन ते जमीनी सतह
पर उपलब्ध करोआई जा'रदी होरनें जरूरी नागरिक स्थूलतें दी समीक्षा कीती। मीडिया कन्नै

गल्लबात करदे होई एडीसी पुंछ होरें जिला प्रशासन दी सब्बै स्थूलतां उपलब्ध करोआने दी बचनबद्धता गी फही पक्का कीता।

<><><><><><>

Weather

मौसम विभाग नै भविक्खवाणी कीती ऐ जे औने आहले दिनें च जम्मू-कश्मीर च मौसम रला-मिला रौहने दी मेद ऐ। ताजा जानकारी मुजब दपैहरी मगरा किश थाहरें पर धूड आली अंधी ते हलकी बरखा पेई सकदी ऐ। 26 थमां 27 मई तगर जम्मू खित्ते च केई थाहरें पर मौसम आमतौरा पर खुशक रौहने दी मेद ऐ ते गर्मी दी लैहर बी बनी दी रौहगा। 28 ते 29 मई गी केई थाहरें पर इक जां दंऊ बारी बरखा जा तेज ब्हाऊ कन्नै अंधी-झक्खड दी संभावना ऐ। 30 मई थमां 2 जून तगर दपैहरी मगरा किश थाहरें पर बरखा जां गरज-चमक होई सकदी ऐ।

<><><><><><>

Mgr-Cricket Team

जून 2026 च होने आहले अफगानिस्तान टूअर लेई भारती पुरूष क्रिकेट टीम दा मैनेजर राजेश धर होरें गी नियुक्त कीता गेआ ऐ। बीसीसीआई लेवल-1 सर्टिफाइड कोच ते फिजिकल एजुकेशनिस्ट राजेश धर होरें जम्मू-कश्मीर क्रिकेट एसोसिएशन च केई महत्वपूर्ण भूमिकाएं च अपनियां सेवां दित्तियां ना। मौजूदा समें च युवा सेवाएं ते खेड्डू मैहकमे च फिजिकल एजुकेशन दे लेक्चरर दे तौर पर धर होर अपनी सेवां देआ'रदे ना। राजेश धर हुंदी नियुक्ति गी खेड्डू अधिकारियें ते जम्मू-कश्मीर क्रिकेट एसोसिएशन दे नुमाइंदें इक महत्वपूर्ण पल करार दित्ता ऐ।

<><><><><><>